

СЕПТЕМВРИЯ В 19 Й ДЕНЬ
СВЯТЫХ МУЧЕНИК ТРОФИМА, САВВАТИЯ И
ДОРИМЕДОНТА.

Стихиры праздника, глас 4.

Подобен: Дал еси знамение:

Крест всесвятый, непобедимая победа, / от земли являемь днесь происходит, / якоже сокровенное сокровище, / обогащая вселенную / зарями всемирныя своея благости. / Тем всеблагое строение славим / на нем сподобльшагося распятися / Христа Бога нашего.

Древле убо ополчения / иноплеменных возвращаше / Крест воображаемь Моисеем, / угодником и верным Боговидцем пророком Божественным. / Ныне же дланьми священными Божественным / возвышением воображаемь, / демонов ополчения и иудеев соборы отгонит, / и обличает безбожных дерзости.

Держава непобедимая христианом нам есть крест Твой, Спасе наш, / имже иноплеменных языков побеждаются множества, / и мир Церкви Твоей, Христе, / православящим добре даровася, / егоже ныне целующе, / Тя молим, Человеколюбче, / части ны сподоби святых Твоих.

Ины стихиры святых, глас 8-й.

Подобен: Мученицы Твои, Господи:

Пищу неизживную желая наследити, / Трофиме мучениче, / болезнми телесными ты питался еси, / и прешел еси от тли к нетлению, / радуясь, свидетельством украшаемь, / тем твоими молитвами испроси всем, блаженне, / велию милость.

Савватий славный, / многия муки претерпев, / ныне праздновати во дворех небесных прерадостно сподобися. / Почести подвиг своих прием, / собором Ангельским причтен. / Того молитвами, / Христе, даруй людем Твоим велию милость.

Безбожных совет отразив, / советы Божественными / ум утверди, Доримедонте: / и приступил еси мужественно ко искушению мук, / победы почести приемля, / Христу сцарствуеши всегда, о всех нас моляся.

Слава, и ныне, глас 4-й:

Восплещем днесь песненное торжество, / и светлым лицом, / и языком ясно возопиим: / нас ради, Христе, суд приемый, / и оплевания и раны, / червленицею одеявыйся и на Крест возшед, / Егоже видевшие солнце и луна свет скрыша, / и страхом земля колебашеся, / и завеса церковная раздрася на двое. / Ты и ныне даруй Крест Твой Честный, / нам блюстителя и хранителя и прогонителя демонов, / яко да вси, облобызающе, вопием ему: / спаси ны, Кресте, силою Твоею, / освяти ны светлостию Твоею, / честный Кресте, / и укрепи ны воздвижением Твоим, / яко свет нам дарован еси и спасение душ наших.

Посем Свете Тихий: Прокимен дне и прочая по уставу.

На стиховне, стихиры, глас 1-й.

Подобен: Небесных чинов:

Крест возносится, / и демоны прогоняются, / разбойник Едема убо врата отверзает, / смерть умерщвляется, / и ныне пуста явися, Христос величается. / Тем веселитесь, / вси земнороднии, клятва разрушися.

Стих: Возносите Господа Бога нашего, / и поклоняйтесь подножию ногу Его, яко свято есть.

Приидите, Боголюбивии вси, / Крест честный возносимый видяще, / возвеличим купно, / и славу дадим Единому Избавителю и Богу, зывающе: / Распныйся на древе Крестнем, не презри молящихся нас.

Стих: Бог же Царь наш прежде века, / содела спасение посреде земли.

Гореть древле ослаждая Моисей, / избави Израиля, / образом Крест прописуя, / Мы же Сего вси Божественно вернии, / таинственно воображающе в сердцах наших всегда, / спасаемся державою Его.

Слава, и ныне, глас 5-й:

Глас пророк Твоих, / Исаии и Давида, / исполнися, Боже, глаголющий: / придут вси языцы, / Господи, и поклонятся пред Тобою. / Се бо людие, иже Твоя, Блаже, / благодати наполнишася, / во дворех Твоих Иерусалима. / Крест Претерпевый за ны, / и воскресением Твоим Животворяй, / сохрани и спаси ны.

Тропарь, глас 8-й :

В Троице хвалимый Бог Троицу мученик прослави, / Трофима и Савватиа и Доримедонта: / в Того бо веровавше, врага низложиша. / Тех молитвами, Христе Боже наш, помилуй нас.

Слава, и ныне, тропарь празднику, глас 1-й:

Спаси, Господи, люди Твоя, / и благослови достояние Твое, / победы на сопротивныя даруя, / и Твое сохраняя Крестом Твоим жительство.